

MGA MISA SA KAOMAWAN
NI NUESTRA SEÑORA DE PEÑAFRANCIA



MGA MISA SA KAOMAWAN NI NUESTRA SEÑORA DE PEÑAFRANCIA

VOLUME II: LECCIONARIO

Ad experimentum
Ad usum Archidioecesis Cacerensis

2020

MGA MISA SA KAOMAWAN
NI NUESTRA SEÑORA DE PEÑAFRANCIA
Volume II: Leccionario

Nihil Obstat:


Rev. Fr. Glenn C. Ruiz
Director, Comision sa Liturgia

Imprimatur:


Most Rev. Rolando J. Tria Tirona, OCD, DD
Arzobispo kan Caceres

Ciudad nin Naga, Filipinas
08 Septiembre 2020, Kafiestahan kan Pagkamundag ni Virgen Maria

An Nihil Obstat asin Imprimatur iyo an pagpapatotoo na an librong ini daing anoman na salà na pag-doctrina o moral. An mga nasabing kapahayagan dai man nangangahulugan na an mga kagtao minauyon sa gabos na laman, tinutubodan o ipinapahayag kan libro.

Katanosan sa Pagsasadiri © 2020
Archidiocesis nin Caceres, Ciudad nin Naga, Filipinas

IPINUBLICAR KAN



ROMANONG CATOLICONG ARCHIDIOCESIS NIN CACERES
sa paagi kan Comision sa Liturgia asin Comision sa Comunicacion
Residencia kan Arzobispo, Elias Angeles St., Ciudad nin Naga, Filipinas

MGA LAOG

Mga babasahon sa Novenario sa Solemnidad

Enot na aldaw	1
Ikaduwang aldaw	4
Ikatulong aldaw	8
Ika-apat na aldaw	11
Ika-limang aldaw	14
Ika-anom na aldaw	17
Ika-pitong aldaw	20
Ika-walong aldaw	23
Ika-siyam na aldaw	26
Solemnidad ni Nuestra Señora de Peñafrancia	29

Mga Pamibi nin Banwaan

Enot na aldaw	33
Ikaduwang aldaw	35
Ikatulong aldaw	37
Ika-apat na aldaw	39
Ika-limang aldaw	41
Ika-anom na aldaw	43
Ika-pitong aldaw	45
Ika-walong aldaw	47
Ika-siyam na aldaw	49
Solemnidad ni Nuestra Señora de Peñafrancia	51
Pasasalamat	53
Bibliografia	53



ARCHIDIOCESIS NIN CACERES
OPISINA KAN ARZOBISPÓ

MENSAHE

An celebracion kan Santa Misa iyo an pinakahalangkaw na gawe nin satong pagpamibi. An satong mga manlaen-laen na mga devucion angay na digdi magtapos. Sa Santa Misa satong nanunumpungan an Hawak asin Dugo kan satong Kagurangan. Omawon niato an Dios sa Santa Misa na satong inoomaw sa paagi kan satong mga novena, mga procesion, pagsulo nin kandila, asin paghapiyap kan imagen ni Jesus.

Maogma akong ipresentar saindo an Leccionario na ini para sa Mga Misa sa Kaomawan ni Nuestra Señora de Peñafrancia. Makatabang lugod ini tanganing mas dakul pang mga tawo na magkusog pa sa saindang pagkamoot ninda ki Virgen Maria na madara sato ki Cristo. Makatabang lugod ini tanganing dakul pang magtalubo sa devucion sa Patrona nin Kabikolan.

Nagpapasalamat ako sa mga naghingowa tanganing mahimo an Leccionario na ini. Katuyuhan na maiheras ini sa kadaklan. Bako lang ining para sa mga Diocesis sa Bikol. An mga organizacion sa iba-ibang lugar sa kinaban na igwa nin celebracion kan Novenario asin Solemnidad ni Nuestra Señora de Peñafrancia inaalok man na gamiton ini. Sa paagi kaini maipahiling niato an pagkasararô sa pag-omaw sa satong Ina, Nuestra Señora de Peñafrancia.

Viva la Virgen!

+ Rolando J. Tria Tirona
✠ **Rolando Octavus Joven Tria Tirona, OCD, DD**
Arzobispo kan Caceres

PÂNO MAARAMAN AN ALDAW KAN FIESTA NI NUESTRA SEÑORA DE PEÑAFRANCIA

Hale sa "When really is Ina's Feast Day"
ni Rebmo. Rex Andrew C. Alarcon, DD (2007)

Arog kan kadaklan, sakuya man kinatodan na sabihon na an fiesta ni Nuestra Señora de Peñafrancia sinecelebrar sa ika-tolong Domingo kan Septiembre. Ini totoo sa kadaklan na beses, alagad bakong danay.

An fiesta ni Nuestra Señora de Peñafrancia dai nakatalaan sa anoman na piling fecha, alagad nakatalaan sa Domingo paka-octava kan Pagkamundag ni Santa Mariang Virgen.

An celebracion na kun saen kaidto sinecelebrar kada enot na Domingo nin Julio nalipat sa bulan nin Septiembre kan an peticion ni Administrador Apostolico Jorge Barge tinawan pagtugot kan Roma sa paagi kan pagpaluwas nin kasugoan kan 1905. Sinasabi kan kasugoan na an aldaw kan fiesta, i.e., "*Dominicae post Octavam Nativitatis ejusdem Deiparae Virginis.*" Ini sa bikol: 'An Domingo paka-Octava kan Pagkamundag kan iyo man sanang Virgen, Ina kan Dios.'

Kadakul an daing isí kaini. Nin huli ta an mga instrucciones dai tulos masasabotan – na kun saen ini complicado nin huli ta kaipo maaraman an tolong bagay: (1) an Pagkamundag ni Virgen Maria; (2) an Octava kan Pagkamundag, asin (3) an Domingo paka-octava.

Kaya, para maaraman an aldaw kan fiesta, an mga minasunod na paagi pwedeng gibohon:

- Enot, hilingon an fecha kan Pagkamundag ni Santa Mariang Virgen, na kun saen, Septiembre 8.
- Pangaduwa, aramon an Octava kan Pagkamundag sa pagbilang nin 8 aldaw poon sa aldaw kan Pagkamundag, Septiembre 8. Sa paggibo kaini, makukua an Septiembre 15.
- Panghuri, hilingon an Domingo na tulos minasunod sa Septiembre 15. Ining Domingo iyo an Solemneng Fiesta kan Virgen kan Peñafrancia.

Sa pagromdom kan instrucion kan kasugoan, pwedeng sabihon na an fiesta kan Virgen kan Peñafrancia nahuhulog sa Domingo na tulos minasunod sa Septiembre 15. Ini an mas simpleng formula.

Pwedeng ikadagdag, sa pagtapos, na an Fiesta ni Nuestra Señora de Peñafrancia, nakatugmad sa rango nin solemnidad, mas nakakalangkaw sa fiesta kan 'Pitong Kamundoan ni Maria', na sinecelebrar sa Domingo paka-octava kan pagkamundag kan Virgen. Nin huli kaini. An 1905 na kasugoan nin Papa Pio X nagtao nin provision sa paglipat kan fiesta kan pito sa "pinakaharaning libreng Domingo susog sa mga Rubrico."

Sakong linalaom, na ining pagmawot na pagpahayag kan mga fecha kan Fiesta magtao sato nin oportunidad na magsalingoy sa naka-agì asin makatabang sa pagpasabot kan mga pagduduwa-duwa, sa satong Pagromdom kan Balaog nin Devpcion ki Nuestra Señora de Peñafrancia.

MGA BABASAHON SA NOVENARIO

Viernes
ENOT NA ALDAW

Para sa mga Familia asin mga Kaakian

Enot na Babasahon

An mga may banal na pagkatakot sa Dios nag-gagalang sa mga magurang.

Pagbasa sa libro ni Sirac

3, 2-6. 12-14

Ginagalangan nin Kagurangnan an ama sa saiyang mga aki;
an ina pinapa-orog sa saiyang mga aki.

An minagalang sa ama nakakabayad kan sadiring mga kasâlan;
an minagalang sa ina kabaing sa nagtitipon nin kayamanan.

An minagalang sa Ama

saiyang ikinakaogma an saiyang sadiring mga Aki;
dadangogon siya sa aldaw na siya namimibi.

Halawig na buhay itatao sa minagalang sa ama:

an nagpapa-ogma sa ina

nagpapahiling nin pagkuyog sa Kagurangnan.

Aki ko, atamana an saimong ama kun siya gurang na;
dai mo pagpamundoon mantang nabubuhay pa.

Minsan maluya na an saiyang isip,
pahilingan mo nin marhay na boót.

Dai mo ipagsikwal kun ika maginhawa asin makusog.

An pagkaherak sa ama dai sagkod pa man malilingawan,
ata ngani magicing kabayaran kan saimong kasâlan.

Tataramon kan Kagurangnan.

Salmo Responsorio

Salmo 128, 1-2. 3. 4-5

S. Paladan an mga natatakot sa Kagurangnan,
an mga naglalakaw sa saiyang mga dalan.

Maogma an mga may pagkatakot sa Kagurangnan,
asin mga naglalakaw sa saiyang mga dalan:
Sa gibo nin saimong mga kamot ika makakan:
mapapasaimo kaogmahan asin kauswagan.

S. Paladan an mga natatakot sa Kagurangnan,
an mga naglalakaw sa saiyang mga dalan.

An saimong agom na babae:
ubas na mabunga sa laog nin saimong harong
An saimong aking lalaki:
palibot sa lamesa, kabaing sa mga sanga nin oliva.

S. Paladan an mga natatakot sa Kagurangnan,
an mga naglalakaw sa saiyang mga dalan.

Totoong paladan na siring kaiyan
an may pagkatakot sa Kagurangnan:
Bendicionan ka nin Kagurangnan hale sa Sion
sa gabos na aldaw nin saimong buhay!
Mahihiling mo an mga aki mo sa maogmang Jerusalem!

S. Paladan an mga natatakot sa Kagurangnan,
an mga naglalakaw sa saiyang mga dalan.

Pagrokyaw bâgo an Evangelio

Colosas 3, 15-16

S. Alleluia, alleluia.

An katoninongan ni Cristo maghade sa saindong mga puso:
an saiyang katukdoan magdanay sa saindo.

S. Alleluia, alleluia.

Evangelio

Nakua si Jesus kan saiyang mga magurang nagtutukaw sa tahaw kan maestro.

✠ Pagbasa kan Evangelio susog ki San Lucas

2, 41-52

Kan si Jesus nasa ika-kagduwang taon,
nagpa-Jerusalem sinda susog sa kinaugalian huli kan pascua.
Kan sinda nagpuli pagkatapos kan fiesta,
si Jesus nagpawalat sa Jerusalem,
dai naishihan kan saiyang mga magurang.
Sa paghona na siya yaon sa mga kairiba,
sarong aldaw pa sinda naglalakaw bâgo hinanap siya
sa saiyang mga kadugo asin katood.
Kan dai siya ninda nakua,
nagbalik sinda sa Jerusalem sa paghanap saiya.
Sa ikatulong aldaw nakua siya ninda sa simbahan,
nagtukaw sa tahaw kan mga maestro,
naghahimate asin naghahapot sainda.
Gabos na nakadangog nangangalas
sa saiyang mga hapot asin mga simbag.
An saiyang mga magurang namongan pakahiling saiya
asin an saiyang ina nagsabi: "Aki, ta siring an ginibo mo samo?
kami na saimong ama asin ina
nahahandal na naghahanap saimo."
Si Jesus nag simbag: "Tadaw ta hinahanap nindo ako?"
dai nindo aram na ako dapat na yaon
sa harong nin sakuyang Ama?"
Dai ninda nasabotan kun ano an boót niyang sabihon.
Si Jesus uminiba sainda sa Nazareth
asin makinuyog-kuyog siya sainda.
Ini gabos rinimpos ni Maria sa saiyang puso.
Si Jesus nagdakula sa pagkasabot, sa lawas asin sa biyaya
sa atubang nin Dios asin nin mga tawo.
Marahay na Bareta kan Kagurangnan.

Sabado
IKADUWANG ALDAW
Para sa mga Jovenes

Enot na Babasahon

Papag-iwalon ko kamo asin an babae; an saimong banhi asin an saiyang banhi.

Pagbasa sa Libro nin Genesis

3, 9-15. 20

A lagad inapod nin Kagurangnan Dios an lalaki, "Haen ka?"
Nagsimbag siya, "Nadangog taka sa tatanoman;
natatakot ako kaya nagtago ako huli ta huba ako."

"Siisay an nagsabi saimo na huba ka?" an hapot nin Dios.

"Nagkakan ka kan bunga kan kahoy na ipinapangalad ko?"

Nagsimbag an lalaki, "An babaeng itinao mo tanganing magin
kaibahan ko iyo an nagtao sako kan bunga, kaya nagkakan ako."

Hinapot nin Kagurangnan Dios an babae,

"Tano ta ginibo mo ini?"

Nag simbag an babae,

"Dinaya ako kan halas kaya nagkakan ako."

Dangan tinaraman nin Kagurangnan Dios an halas,

"Huli ta ginibo mo ini, isinusampa taka sa gabos na hayop.

Poon ngonian magkakamang ka asin kabokabo
an saimong kakakanon sa bilog mong pagkabuhay.

Papag-iwalon ko kamo asin an babae;
an saimong payo, asin hahampakon mo an saiyang bool."

Eva an inginaran ni Adan sa saiyang agom,

huli ta siya an ina kan gabos na tawo.

Tataramon kan Kagurangnan.

S. An sakong puso naoogma sa Kagurangnan,
sakuyang paraligtas.

Namibi si Hanna: An sakong puso nag-oogma sa Kagurangnan;
naogma ako huli kan saiyang ginibohan!
Mga kaiwal sakong ngingisihan;
maogma akong marahay huli kan saiyang tabang!

S. An sakong puso naoogma sa Kagurangnan,
sakuyang paraligtas.

An panâ kan mga mapangyari nagkakabarari,
alagad nagkukusog an mga maluya.

An tawong dating barasog nagpapatandan ngonian,
tanganing makakua sana nin pagkakan,
alagad an mga dating nagugutom, basog na ngonian.
An babaeng baog nangaki nin pito,
alagad an ina nin dakul dai natandaan maski sarô.

S. An sakong puso naoogma sa Kagurangnan,
sakuyang paraligtas.

An Kagurangnan an minagadan asin minabuhay-liwat;
isinusubol niya an mga tawo sa Sheol
asin binubuhay giraray.

An iba saiyang pinapangagin dukha, an iba mayaman;
an iba saiyang ibinabasa, an ibang ilinalangkaw.

S. An sakong puso naoogma sa Kagurangnan,
sakuyang paraligtas.

Binuhat niya an mga dukha hale sa alpog
asin an mga nangangaipo hale sa tambak nin abo.
Pinapatukaw niya sinda sa kaibahan nin mga prinsipe,
asin ibinugtak sa mga lugar na iginagalang.

Huli ta an mga harigi kan kinaban sadiri nin Kagurangnan;
asin sa ibabaw kaiyan itinugdok niya an kinaban.

S. An sakong puso naoogma sa Kagurangnan,
sakuyang paraligtas.

Pagrokyaw bâgo an Evangelio

Lucas 1, 45

S. Alleluia, alleluia.

“Paladan ka
ta nagtubod kang mauutob an sinabi saimo nin Kagurangnan!”

S. Alleluia, alleluia.

Evangelio

An ginikanan ni Jesu Cristo, aki ni David, aki ni Abraham.

✖ Pagbasa kan Evangelio susog ki San Mateo

1, 1-16. 18-21

Iyo ini an mga ginikanan ni Jesu Cristo,
na gikan ki David, na gikan ki Abraham.

Si Abraham ama ni Isaac,
si Isaac ama ni Jacob,
si Jacob ama ni Juda saka kan mga tugang niya;
si Juda ama ni Fares asin ni Zera (si Tamar an saindang ina),
si Fares ama ni Esrom, si Esrom ama ni Aram;
si Aram ama ni Aminadab,
si Aminadab ama ni Naason,
si Naason ama ni Salmon;
si Salmon ama ni Boaz (si Rahab an saiyang ina),
si Boaz ama ni Obed (si Ruth an saiyang ina),
si Obed ama ni Jesse;
si Jesse iyo an ama ni Hadeng David.

Si David ama ni Solomon (an saiyang ina dating agom ni Urias);
si Solomon ama ni Roboam,
si Roboam ama ni Abias,
si Abias ama ni Asa;
si Asa ama ni Josafat,
si Josafat ama ni Joram,
si Joram ama ni Uzias;
si Uzias ama ni Jotam,
si Jotam ama ni Acaz,
si Acaz ama ni Ezekias;
si Ezekias ama ni Manases,
si Manases ama ni Amon,
si Amon ama ni Josias;

si Josias ama ni Jeconias saka kan mga tugang niya,
kan panahon na madestiero an mga Israelita sa Babilonia.

Kan nakadestiero na an mga Israelita sa Babilonia,
iyo ini an mga ginikanan: si Jeconias ama ni Sealtiel,
si Sealtiel ama ni Zorobabel;
si Zorobabel ama ni Abiud,
si Abiud ama ni Eliakim,
si Eliakim ama ni Azor;
si Azor ama ni Zadok,
si Zadok ama ni Akim,
si Akim ama ni Eliud;
si Eliud ama ni Eleazar,
si Eleazar ama ni Matan,
si Matan ama ni Jacob;
si Jacob ama ni José, na agom ni Maria,
na ina ni Jesus, na inaapod Cristo.

Siring kaini an pagkamundag ni Jesu Cristo.
Si Maria na saiyang ina ikinasal ki José,
alagad bâgo sinda kasalon, nangingidam na si Maria.
An saiyang ipinapangidam gikan sa Espiritu Santo.

Si José sarong matanos na lalaki
asin habo niyang masopgan si Maria;
kaya nag-isip siyang suhayan ini sa hilom.

Mantang iniisip ini ni José,
nagpahiling saiya sa pangatorogan
an sarong angel nin Kagurangnan na nagsabi,
“José, aki ni David,
dai ka magalang-alang akoon si Maria,
huli ta an ipinapangidam niya gikan sa Espiritu Santo.”

Marahay na Bareta kan Kagurangnan.

Domingo
IKATOLONG ALDAW
Para sa mga Religiosos

Sa Ikatolong aldaw kan novenario iyo an Domingo kan Ordinariong panahon, an Misa kan aldaw an pinagsecelebrar. Kun kinaugalian sa ibang lugar na kun saen an Misa novenario sinecelebrar sa ibang mga fetsa nin huli sa dahilan pastoral, an Misa sa ikatolong aldaw kan novenario gagamiton.

Enot na Babasahon

An Kagurangan nagtaram sa satong mga magurang, ki Abraham asin sa saiyang tinubo sagkod pa man.

Pagbasa sa Libro nin Genesis

12, 1-7

Tinaraman nin Kagurangan si Abram,
“Bayaan mo an saimong dagâ,
an saimong mga kadugo asin an harong kan saimong ama
dangan magduman ka sa dagang ipapahiling ko saimo.”

“Gigibohon takang sarong dakulang nacion,
bebendicionan taka asin gigibohon kong bantog
an saimong ngaran tanganing ika magin sarong bendicion.
Bebendicionan ko an mga mabendicion saimo,
asin isusumpa ko man an mga masumpa saimo.
Sa paagi mo bebendicionan ko man an gabos na nacion sa dagâ.”

Kaya kan anom na pulong may lima na an edad ni Abram
binayaan niya an Haran susog sa itinaram saiya nin Kagurangan:
nag-iba saiya si Lot.

Ipinag-iba ni Abram si Sarai na saiyang agom,
asin an sobrino niyang si Lot
patin an mga oripon na napa-sainda sa Haran;
dara man ninda an gabos nindang pagsadiri.
Dangan naglakaw sinda pasiring sa dagâ nin Canaan.
Pag-abot ninda duman, nagpadagos pa sa paglakaw si Abram
sagkod na makaabot siya sa sagradong kahoy nin More,
an banal na lugar sa Shekem.

(Kaidtong panahon duman pa nag-eerok an mga Cananeo.)

Nagpahiling an Kagurangnan ki Abram asin nagtaram saiya,
"Iyo ini an dagâ na itatao ko sa saimong mga kapag-arakian."
Kaya naggibo siya duman nin altar
para sa Kagurangnan na nagpahiling saiya.

Tataramon kan Kagurangnan.

Salmo Responsorio

Judit 13, 18. 19. 20

S. Ika an pinakahalangkaw na honra kan samuyang angkan.

Dangan nagsabi si Uzzias, "Judit, aki ko,
benendicionan ka kan Kahorohalangkaweng Dios
orog ki sa ibang babae digdi sa dagâ.

Maninigong omawon an Kagurangnan Dios
na naglalang kan langit asin dagâ!

Giniyahan ka niya kan putolon mo an payo
kan pinakamakuring kaiwal niato."

S. Ika an pinakahalangkaw na honra kan samuyang angkan.

"An masarig mong paglaom sa Dios
dai mapaparà sa kaisipan nin mga tawo
mantang ginigiromdom ninda
an kapangyarihan nin Dios."

S. Ika an pinakahalangkaw na honra kan samuyang angkan.

"Tawan ka lugod nin Dios
nin kaomawan na mayong kataposan huli kan ginibo mo.
Balosan ka lugod niya nin mga bendicion,
huli ta nagdanay kang maimbod saiya
asin dai ka nagduwa-duwang ibugtak sa pag-alaman
an sadiri mong buhay
tanganing mawara an pagkaapi kan sadiri mong banwaan."

S. Ika an pinakahalangkaw na honra kan samuyang angkan.

Pagrokyaw bâgo an Evangelio

Lucas 2, 19

S. Alleluia, alleluia.

Ini gabos rinimos ni Maria sa saiyang puso asin pinaghорop-horop.

S. Alleluia, alleluia.

Evangelio

Nangaki siya kan saiyang panganay na lalaki.

✚ Pagbasa kan Evangelio susog ki San Lucas

2, 1-7

Kan panahon na idto, nagboót si Caesar Augusto na magcenso
kan gabos na tawong sakop kan imperio kan Roma.

An enot na pagcensong ini
ginibo kan si Cirenio an gobernador sa Siria.

Kaya nagpuruli an mga tawo sa sadiri nindang banwaan
nganing magpacenso.

Hale sa banwaan nin Nazareth sa Galilea
nagpuli si José sa banwaan nin Bethlehem sa Judea,
banwaan na namundagan ni Hadeng David.

Sa Bethlehem siya mapacenso
huli ta gikan siya sa kapag-arakian ni David.
Kaiba niya sa pagcenso si Maria na ikakasal saiya.

Bados si Maria, asin mantang yaon sinda duman,
uminabot an panahon kan pag-aki ni Maria.
Nangaki siya kan saiyang panganay na lalaki.

Pinatos niya nin lampin an omboy
saka hinulid sa sarong bahugan,
huli ta mayo na nin lugar para sainda
sa harong na sakatan.

Marahay na Bareta kan Kagurangnan.

Lunes
IKA-APAT NA ALDAW

Para sa mga Laiko asin mga Nagtatarabaho sa mga Parokya

Enot na Babasahon

Itatao saiya nin Kagurangnan Dios an trono ni David na saiyang ama.

Pagbasa sa Ikaduwang Libro ni Samuel

7, 1-5. 8b-11. 16

Kan sa palacio na nag-eerok si Hadeng David,
Kasin kan dai na siya linalabanan
kan gabos niyang mga kaiwal
huli sa tabang nin Kagurangnan,
sinabihan niya an profetang si Natan,
“Uya ako nag-eerok sa harong na ginibo sa sedro,
alagad sa sarong tulda sana namumugtak
an Kaban nin Tipan nin Dios!”
Nagsimbag si Natan, “Giboha an nasa isip mo,
huli ta kaiba mo an Kagurangnan.”
Alagad kan bangging idto, nagtaram an Kagurangnan ki Natan,
“Lakaw asin kaibahan mo si David na sakong surogoon,
‘Siring an itinaram nin Kagurangnan, bakong ika
an mapatugdok nin harong na sakuyang eerokan.’
‘Kaya sabihan mo si David na sakong surogoon na ako,
an Kagurangnan nin mga hukbô an nagtataram saiya,
kinua taka hale sa pagpastor nin mga karnero sa kaomahan
asin ginibo takang hade kan sakong banwaan nin Israel.
Inibahan taka saen ka man magduman, asin dinaog ko
an gabos mong kaiwal mantang nagdadangadang ka.
Gigibohon kong magin bantog an saimong ngaran,
arog kan ngaran kan mga darakulang lider sa kinaban.
Nagpili na ako nin sarong lugar para sa sakong banwaan
nin Israel asin pinapag-erok ko na sinda duman,
kun saen dai na sinda aapihon.
Kaidto danay na sinalakay sinda nin mga mariringis na tawo,
alagad dai na iyan magyayari ngonian.
Nanunuga ako na ililigtas taka sa gabos mong kaiwal
asin tatawan taka nin mga kapag-arakian.

Danay kang magkakaigwa nin mga kapag-arakian,
asin an saimong trono magdadanay sagkod lamang,
mayo nin kataposan an saimong kahadean.' "

Tataramon kan Kagurangnan.

Salmo Reponsorial

Salmo 45, 11-12. 14-15. 16-17

S. Maghinanyog ka sako, aki kong babae,
hilnga asin iduko an saimong talinga.

Mamawoton kan hade an saimong kagayonian;
siya an saimong Kagurangnan, kaya kuyogon mo siya.
Mga taga-Tiro madara saimo nin mga regalo;
mga tawong mayaman magmamawot na mawilihan mo.

S. Maghinanyog ka sako, aki kong babae,
hilnga asin iduko an saimong talinga.

Sulot an gubing na manlaen-laen an kolor,
an prinsesa inaatubang sa hade,
kaiba an mga abay na daraga na nagsusunod saiya.
Maogma sinda asin magaya-gaya,
mantang dinadara asin ilinalao sa palacio kan hade.

S. Maghinanyog ka sako, aki kong babae,
hilnga asin iduko an saimong talinga.

Sakong hade, magkakaigwa ka nin dakul na aking lalaki,
na masalihid bilang mga hade sa mga ginikanan mo,
asin gigibohon mo sindang mga pamayo sa bilog na dagâ.
Bubuhayon kan sakong awit,
an saimong dangog sagkod pa man;
oomawon ka nin mga banwaan sa panahon na daing kasagkoran.

S. Maghinanyog ka sako, aki kong babae,
hilnga asin iduko an saimong talinga.

Pagrokyaw bâgo an Evangelio

S. Alleluia, alleluia.

Paladan ka, mahal na Virgen Maria, maninigo nin gabos na pag-omaw;
hale saimo nagsirang an saldang nin katanosan,
Si Cristo na Kagurangnan.

S. Alleluia, alleluia.

Evangelio

Paladan siyang nagtutubod na mauutob an sinabi kan Kagurangnan.

✠ Pagbasa kan Evangelio susog ki San Lucas

1, 39-47. 56

Pakalihis nin nagkapirang aldaw,
nag-andam si Maria asin hidaling nagduman
sa sarong banwaan sa kabubulodan nin Juda.

Pagdagos niya sa harong nin Zacarias,
nagtaong galang siya ki Isabel.

Pagkadangog ni Isabel kan pagtaong-galang ni Maria,
humiro an aki sa tulak niya.

Napanô kan Espiritu Santo si Isabel,
asin nagtaram nin makusog,
“Paladan ka sa gabos na babae
asin paladan an aki na dinara mo sa saimong popônan!

Siisay ako na pagsungkoon kan ina nin sakong Kagurangnan?
Huli ta pagkadangog ko kan saimong pagtaong-galang,
huminiro sa kaogmahan an aki sa sakuyang popônan.

Paladan ka ta nagtubod kang mauutob
an sinabi saimo nin Kagurangnan!”

Nagsabi si Maria,
“An sakong puso nag-oomaw sa Kagurangnan;
an sakong kalag nag-oogma sa Dios na sakong Paraligtas.”

Nag-erok si Maria kaibahan si Isabel
sa laog nin mga tolong bulan,
dangan nagpuli na siya.

Marahay na Bareta kan Kagurangnan.

Martes
IKA-LIMANG ALDAW
Para sa mga Paratukdo asin mga Media Practitioners

Enot na Babasahon

Si Maria, kamurawayan kan banwaan nin Dios.

Pagbasa sa Libro ni Sirac

24, 1. 3-4. 8-12. 19-21

Paghinanyog kamo sa Kadonongan!
Inaawit niya an sadiri niyang kaomawan
sa tahaw kan mga Israelita, an sadiri niyang banwaan,
“Ako an tataramon na nagluwas sa nguso kan Kahorohalangkawe,
asin tinahoban ko an dagâ arog sa pagtahob kan ambon.
An pinakahalangkaw na kalangitan an sakong harong,
asin yaon sa sarong hariging panganoron an sakong trono.
Dangan an sakong Kaglalang, an naglalang kan kinaban,
nagsabi sako kun saen ako maerok.
Nagsabi siya, ‘An Israel an gibohon mong harong.
An mga kapag-arakian ni Jacob
iyo an saimong magigin banwaan.’
Linalang niya ako sa daing kataposan,
bâgo magpoon an panahon,
asin padagos akong mabubuhay
sagkod sa panahon na daing kataposan.
Naglingkod ako saiya sa banal na Tabernaculo
dangan ginibo kong harong an Bukid nin Sion.
Pinaerok niya ako sa namotan na ciudad
asin tinawan niya ako nin awtoridad na mamayo sa Jerusalem.
Kaya nagkagamot ako sa ginagalang na banwaan
na pinili nin Kagurangnan bilang sadiri niya.
Madya kamo sako, kamo gabos na nagmamawot sako,
asin magpakabasog kamo sa sakong mga bunga.
Magigiromdoman nindo ako sa orog na mahamis ki sa dugos,
mas marahay ki sa dugos hale sa mga anira.

Kakana nindo ako, asin madugang pa
an saindong kagutoman sa sako,
inoma nindo ako, asin madugang pa
an saindong pagkapaha sa sako.

Tataramon kan Kagurangan.

Salmo Reponsorial

Salmo 113, 1-2. 3-4. 5-6. 7-8

S. Omawon an ngaran nin Kagurangan sagkod pa man.

Omawon ang Kagurangan!
Kamong mga surogoon nin Kagurangan,
omawon nindo an saiyang ngaran!
Omawon an ngaran nin Kagurangan
ngonian asin sagkod pa man.

S. Omawon an ngaran nin Kagurangan sagkod pa man.

Poon sa sirangan sagkod sa sulnongan
pag-omawon an ngaran nin Kagurangan!
Halangkaw sa gabos na nacion an Kagurangan;
halangkaw sa kalangitan an saiyang kamurawayan.

S. Omawon an ngaran nin Kagurangan sagkod pa man.

Siisay an makakaarog sa Kagurangan na satuyang Dios,
na nag-eerok sa kaitaasan,
na nag dudungaw sa langit asin dagâ?

S. Omawon an ngaran nin Kagurangan sagkod pa man.

Hale sa alpog binanagon niya an dukha;
hale sa basurahan binabangon niya an mga daing sukat,
tanganing patukawon kaiba kan mga prinsipe,
mga prinsipe kan saiyang banwaan.

S. Omawon an ngaran nin Kagurangan sagkod pa man.

S. Alleluia, alleluia.

Nagdolok ki Maria an angel dangan nagsabi,
“An katoninongan mapa-saimo, paladan na babae!
An Kagurangnan yaon saimo!”

S. Alleluia, alleluia.

Evangelio

Jose, daraha an mag-iná sa Egipto.

✠ Pagbasa kan Evangelio susog ki San Mateo

2, 13-15. 19-23

Pakahale kan mga mago, an mga angel nin Kagurangnan
nagpahiling ki José sa pangaturogan asin nagsabi,
“Magbangon ka; idulag mo sa Egipto an mga-iná.
Dai ka maghale duman sagkod sa sinabihan taka,
huli ta hahanapon ni Herodes an aki tanganing gadanon.”

Kaya nagbangon si José asin kan banggi man sanang iyan,
idinulag niya an mag-iná pasiring sa Egipto.

Duman sinda nag-eerok sagkod na nagadan si Herodes.

Nangyari ini tanganing mautob an itinaram nin Kagurangnan
sa paagi kan profeta, “Inapod ko an sakong Aki hale sa Egipto.”

Kan gadan na si Herodes, nagpahiling ki José sa pangaturogan
duman sa Egipto an angel nin Kagurangnan, asin nagsabi,
“Magbangon ka, magbalik na kamo sa Israel,
huli ta gadan na an mga naghumang gumadan sa aki.”

Kaya ipinag-iba ni José an mga-iná papuli sa dagâ nin Israel.
Alagad natakot si José na magbalik sa Judea
kan mabaretaan niya si Arkelao an nakasalihid sa hade
sa saiyang ama na si Herodes.

Huli ta pinatanidan si José sa panagturogan,
nagdagos siya sa dagâ nin Galilea.

Nag-erok siya sa banwá na inaapod Nazareth.

Nangyari ini tanganing mautob an sinabi kan mga profeta,
“Aapodon siyang Nazareno.”

Marahay na Bareta kan Kagurangnan.

Miercoles
IKA-ANOM NA ALDAW

Para sa mga may Helang, mga Gurang asin mga Nagtatrabaho sa Salud
Enot na Babasahon

Pag-ogma! O Sion! Hilinga, maabot na ako.

Pagbasa sa Libro ni Profeta Zacarias

2, 14-17

Nagtaram an Kagurangnan,
“Pag-awit asin Pag-ogma! O Sion.
Maabot na ako tanganing mag-erok sa kaibahan nindo!”

Sa panahon na iyan dakul na nacion an madolok sa Kagurangnan
asin magigin saiyang banwaan.
Maerok siya sa kaibahan nindo,
dangan maaraman nindo na sinugo niya ako sa saindo.

An Juda magigin giraray sarong mahalagang rogaring
nin Kagurangnan sa banal na dagâ,
asin an Jerusalem iyo an ciudad
na mamomotan niya nin orog sa gabos.

Pag-alo kamo gabos sa atubang nin Kagurangnan,
huli ta madigdi siya hale sa saiyang banal na erokan.

Tataramon kan Kagurangnan.

Salmo Responsorio

Salmo 126, 1-2. 4-5. 6

**S. Ngangalasan ginibo nin Kagurangnan
panô kita nin dakulang kaogmahan.**

Kan an Sion ilinigtas nin Kagurangnan,
ilinigtas hale sa kaoripnan,
garo sarong pangaturogan.
May mga ngisi sa satong mga nguso,
may mga awit sa satong mga dila.
Kagurangnan, ligtasan kami sa kaoripnan;
siring sa mga burabod sa alang na dagâ.
An mga minasabwag sa luha,
maawit mantang mina-ani sa ogma.

**S. Ngangalasan ginibo nin Kagurangnan
panô kita nin dakulang kaogmahan.**

Sinda minaluwas, naluwas panô nin mga luha,
dara an banhi na isasabwag;
sinda nagbalik, nagbalik panô nin mga awit,
dara an saindong mga inani.

**S. Ngangalasan ginibo nin Kagurangnan
panô kita nin dakulang kaogmahan.**

Pagrokyaw bâgo an Evangelio

Lucas 1, 45

S. Alleluia, alleluia.

“Paladan ka
ta nagtubod kang mauutob an sinabi saimo nin Kagurangnan!”

S. Alleluia, alleluia.

Evangelio

Sarong matarom na espada, malagbas sa saimong puso

✖ Pagbasa kan Evangelio susog ki San Lucas

2, 27-35

Sa pasabong kan Espiritu Santo, naglaog si Simeon sa Templo.
Kan an omboy na si Jesus darahon duman
kan saiyang mga magurang
sa pag-utob kan hinahagad kan Katugonan,
kinua siya ni Simeon asin itinaas,
dangan nagpasalamat sa Dios na an sabi:

“Kagurangnan, tugoti nang magadan sa katoninongan
an saimong surugoon susog sa saimong panuga,
huli ta nahiling ko na an saimong kaligtasan,
na inandam mo para sa gabos na tawo.

Sarong ilaw na magliliwanag sa mga pagano,
asin magtatao nin kamurawayan sa Israel
na saimong banwaan.”

Nagngalas si José asin si Maria sa sinabi ni Simeon dapit sa aki.
Benendicionan sinda ni Simeon,

asin sinabihan si Maria na saiyang ina,

“Uya, an aking ini itinalaga para sa pagkapadungkal
asin pagbangon nin dakul sa Israel;

saro siyang tanda hale sa Dios

na isisikwal nin dakul na tawo,

kaya mahahayag an saindang iniisip.

Dangan an kamundoan, siring sa sarong matarom na espada,
malagbas sa saimong puso.”

Marahay na Bareta kan Kagurangnan.

Jueves
IKA-PITONG ALDAW
Para sa mga Tios asin mga NASA Bilanggoan

Enot na Babasahon

Sarong aking lalaki itinao sa sato.

Pagbasa sa Libro ni Profeta Isaias

9, 1-6

Mayo nin paagi para sa ina tanganing makadulag sa panahon na ini nin kasakitan.

An dagâ kan mga tribu ni Zabulon asin ni Neftali,
na kaidto dagâ nin kasusupgan,
iyo an magdadara nin kaomawan sa rehiyon na ini,
magpoon sa Dagat nin Mediteraneo pasiring sa sirangan,
sa dagâ sa ibong kan Salog nin Jordan,
asin maski sa Galilea mismo,
na pinag-eerokan kan mga dayuhan.

Nakahiling nin dakulang liwanag
an mga tawong naglakaw sa kadikloman.

An mga nag-erok sa dagâ nin mahibog na kadikloman,
naliliwanagan na ngonian.

Tinawan mo sinda nin dakulang kaogmahan, Kagurangnan;
pinaogma mo sinda.

Naoogma sinda sa saimong ginibo,
siring na naoogma an mga tawo kun sinda nag-aani
o kun sinda naghihiras kan mga sinamsam.

Huli ta saimong binari an sakal na nakakapagabat sainda
asin an sugkod na ipinapakol sa saindang mga abaga.

Dinaog mo an nacion na nag-api asin nandaya
kan saimong banwaan,

siring na dinaog mo kaidto an hukbô nin Midian.

An mga sapatos kan minasalakay na hukbô
asin an gabos nindang nadugoan na gubing
susuloon siring sa igatong.

Huli ta sarong aki an namundag sato!

Sarong aking lalaki an itinao sato!

Siya an satong magigin pamayo.

Tataramon kan Kagurangnan.

S. Kagurangnan, dai mo kami pagsilotan
susog sa samong mga kasâlan.

Hare paggiromdoma tumang samo
an katamplasan nin samong mga magurang;
ata ngani pahilngan tulos an saimong pagkaherak,
huli ta kami nasa makuring kahorasaan.

S. Kagurangnan, dai mo kami pagsilotan
susog sa samong mga kasâlan.

O Dios, samong Paraligtas, madya sa pagtabang samo;
madya huli sa kamurawayan nin saimong ngaran.

O Dios na samong Kagurangnan,
patawada an samong mga kasâlan asin ligtasan kami.

S. Kagurangnan, dai mo kami pagsilotan
susog sa samong mga kasâlan.

Makaabot sa atubang mo an inagrangay kan mga nasa bilanggoan,
sa saimong kapangyarihan ligtasan
an mga sinilotan nin kagadanan.

Asin kami na saimong banwaan,
magpapasalamat saimo sagkod pa man,
sa gabos na panahon ipagroryaw mi sa saimong kamurawayan.

S. Kagurangnan, dai mo kami pagsilotan
susog sa samong mga kasâlan.

Pagrokyaw bâgo an Evangelio

Lucas 2, 19

S. Alleluia, alleluia.

Ini gabos rinimos ni Maria sa saiyang puso asin pinaghорop-horop.

S. Alleluia, alleluia.

Evangelio

Babae, uya an saimong aki. Aki, uya an saimong ina.

✠ Pagbasa kan Evangelio susog ki San Juan

19, 25-27

Nakatindog harani sa cruz si Jesus an saiyang ina,
saka an tugang na babae kan saiyang ina,
si Maria na agom ni Cleofas,
asin si Maria Magdalena.

Kan mahiling ni Jesus an saiyang ina,
asin an disipulo na padangat niya sa kataed kaini,
sinasabi niya an saiyang ina,
“Babae, uya an saimong aki.”

Dangan sinabihan niya an disipulo,
“Uya an saimong ina.”

Poon kaidto, inako kan disipulo
an ina ni Jesus sa saiyang harong.

Marahay na Bareta kan Kagurangnan.

Viernes
IKA-WALONG ALDAW

Para sa mga Padi asin mga Seminarista

Enot na Babasahon

An kaban nin Tipan nin Dios dinara ninda sa tolda na inandam ni David.

Pagbasa sa Enot na Libro nin mga Cronica

15, 3-4. 15-16. 16, 1-2

Kaya tinipon ni David sa Jerusalem an bilog na Israel tanganing darahon an Kaban nin Tipan sa lugar na inamdaman niya para digdi.

Dangan tinipon niya an mga aking lalaki ni Aaron asin an mga Levita.

Pinsan kan mga lalaki an Kaban nin Tipan nin Dios sa paagi kan olayan, susog sa ipinagboót nin Kagurangnan ki Moises. Pinagbôtan man ni David an mga lider kan mga Levita na ibugtak an iba nindang tugang tanganing mag-awit asin magtugtog nin maogmang musika sa mga arpa, lira saka gimbal.

An Kaban nin Tipan nin Dios dinara ninda sa tulda na inandaman ni David.

Ibinugtak ninda duman sa Kaban nin Tipan, dangan nagdolot sinda sa Dios nin mga tinutong na atang saka mga dolot para sa katoninongan.

Pakadolot ni David kan mga sacrificio, benedicionan niya an mga tawo sa ngaran nin Kagurangnan.

Tataramon kan Kagurangnan.

S. Uya ako Kagurangnan, uya sa pag-utob kan saimong kabôtan.

Dangan ako nagsabi: "Uya ako;
mga katukodan mo para sako nasusurat sa libro.

O Dios ko, naoogma ako sa pag-utob kan kabôtan mo;
an saimong tugon rimpos ko sa sakuyang puso.

S. Uya ako Kagurangnan, uya sa pag-utob kan saimong kabôtan.

O Dios ko, naoogma ako sa pag-utob kan kabôtan mo;
an saimong tugon rimpos ko sa sakuyang puso."

Kagurangnan, sa katiriponan kan saimong banwaan,
ipinahayag ko an marahay na bareta nin kaligtasan.
Aram mong dai ako maontok sa pagrokyaw kaiyan.

S. Uya ako Kagurangnan, uya sa pag-utob kan saimong kabôtan.

An bareta nin kaligtasan dai ko tinago para sa sako lamang;
ibinareta ko an saimong pagkamaimbod asin kaligtasan!

Dai ko tinago sa katiriponan
an danay mong pagkamoot asin pagkamaimbod.

S. Uya ako Kagurangnan, uya sa pag-utob kan saimong kabôtan.

Hare pagsayumahan sako an saimong pagkaherak, Kagurangnan.
Ingatan lugod ako kan saimong pagkamaimbod
asin danay na pagkamoot.

S. Uya ako Kagurangnan, uya sa pag-utob kan saimong kabôtan.

Pagrokyaw bâgo an Evangelio

S. Alleluia, alleluia.

Paladan ka, mahal na Virgen Maria,
maninigo nin gabos na pag-omaw;
hale saimo nagsirang an saldang nin katanosan,
Si Cristo na Kagurangnan.

S. Alleluia, alleluia.

Evangelio

Ini gabos rinimpos ni Maria sa saiyang puso asin pinaghорop-horop.

✠ Pagbasa kan Evangelio susog ki San Lucas

2, 15-19

Pagkahale kan mga angel pabalik sa langit,
nagsabi an mga pastor,
“Magduman kita sa Bethlehem!
Hilingon ta an nangyaring ini
na ibinareta sato nin Kagurangnan.”
Kaya hidali sindang nagduman.

Nakua ninda si Maria, José saka an omboy,
na nahuhulid sa bahugan.

Kan mahiling kan mga pastor an omboy,
ibinareta ninda an sinabi sainda kan angel dapit saiya.
An gabos na nakadangog
kan ibinareta kan mga pastor nagngaralas.

Ini gabos rinimpos ni Maria sa saiyang puso
asin pinaghорop-horop.

Marahay na Bareta kan Kagurangnan.

Sabado
IKA-SIYAM NA ALDAW

Para sa mga Lideres asin mga Nagtatrabaho sa Gobierno

Enot na Babasahon

Si Maria, tukawan asin Kadonongan.

Pagbasa sa Libro nin mga Talinhaga

8, 22-31

Ako an enot na linalang nin Kagurangnan,
an enot sa mga ginibo niya kaitdong panahon.
Linalang niya ako sa kapinônan,
sa kaenot-enote, bâgo nagpoon an kinaban.

Namundag ako kan mayo pa an kadagatan,
kan mayo pa an mga burabod nin tubig.
Namundag ako bâgo an kabukidan,
bâgo ibinugtak sa tamang lugar an kabubulodan,
bâgo ginibo nin Dios an dagâ asin an kaomahan kaiyan;
enot ako maski sa naenot sa alpog kan kinaban.

Idtoon ako duman kan lalangon niya an kalangitan,
kan palibotan niya nin orisonte an ibabaw kan dagat.
Idtoon ako kan mga panganoron ibinugtak sa langit,
kan bukasan niya an mga burabod kan kairaroman,
kan itao niya sa dagat an pagdulonan kaiyan,
tanganing an katubigan dai maglagpas sa saiyang pagboót,
kan ibugtak niya an fundacion kan dagâ.

Nasa kataed niya ako, arog sa sarong arkitekto.
Ako an kaogmahan niya aroaldaw,
asin sa atubang niya, ako danay na nagoogma;
nag-oogma sa saiyang kinaban,
asin nawiwili sa katawohan.

Tataramon kan Kagurangnan.

S. An Reina nakatindog sa too mong kamot,
nasasamnohan nin bulawan.

Nobyta kan hade,
hinanyoga an sakong sasabihon
lingawan mo an saimong banwaan
asin an saimong mga kadugo.

S. An Reina nakatindog sa too mong kamot,
nasasamnohan nin bulawan.

Mamawoton kan hade an saimong kagayonan;
siya an saimong Kagurangnan,
kaya kuyogon mo siya.

S. An Reina nakatindog sa too mong kamot,
nasasamnohan nin bulawan.

Mga taga-Tiro madara saimo nin mga regalo;
mga tawong mayaman
magmamawot na mawilihan mo.

S. An Reina nakatindog sa too mong kamot,
nasasamnohan nin bulawan.

Sakong hade, magkakaigwa ka nin dakul na aking lalaki,
na masalihid bilang mga hade sa mga ginikanan mo,
asin gigibohon mo sindang mga pamayo sa bilog na dagâ.

S. An Reina nakatindog sa too mong kamot,
nasasamnohan nin bulawan.

Pagrokyaw bâgo an Evangelio

Lucas 1, 28

S. Alleluia, alleluia.

Nagdolok ki Maria an angel dangan nagsabi,
“An katoninongan mapa-saimo, paladan na babae!
An Kagurangnan yaon saimo!”

S. Alleluia, alleluia.

Evangelio

Paladan an popônan na nagdara saimo.

✠ Pagbasa kan Evangelio susog ki San Lucas

11, 27-28

Mantang nagtataram si Jesus,
sarong babae sa kadaklan
an nagsabi saiya sa makusog na tingog,
“Paladan an babaeng nangaki asin nagpasuso saimo!”

Alagad nagsimbag si Jesus,
“Orog na paladan
an mga nagdadangog kan tataramon nin Dios
asin nag-uutob kaiyan.”

Marahay na Bareta kan Kagurangnan.

Domingo Paka-Octava kan Pagkamundag ni Santa Maria

**NUESTRA SEÑORA DE PEÑAFRANCIA
PATRONA KAN KABIKOLAN**

Solemnidad

Misa sa Aldaw

Enot na Babasahon

Papag-iwalon ko kamo asin an babae; an saimong banhi asin an saiyang banhi.

Pagbasa sa Libro nin Genesis

3, 9-15. 20

A lagan inapod nin Kagurangnan Dios an lalaki, "Haen ka?"
Nagsimbag siya, "Nadangog taka sa tatanoman;
natatakot ako kaya nagtago ako huli ta huba ako."

"Siisay an nagsabi saimo na huba ka?" an hapot nin Dios.

"Nagkakan ka kan bunga kan kahoy na ipinapangalad ko?"

Nagsimbag an lalaki, "An babaeng itinao mo tanganing magin
kaibahan ko iyo an nagtao sako kan bunga, kaya nagkakan ako."

Hinapot nin Kagurangnan Dios an babae,

"Tano ta ginibo mo ini?"

Nag simbag an babae,

"Dinaya ako kan halas kaya nagkakan ako."

Dangan tinaraman nin Kagurangnan Dios an halas,

"Huli ta ginibo mo ini, isinusampa taka sa gabos na hayop.

Poon ngonian magkakamang ka
asin kabokabo an saimong kakakanon
sa bilog mong pagkabuhay.

Papag-iwalon ko kamo asin an babae; an saimong payo,
asin hahampakon mo an saiyang bool."

Eva an inginaran ni Adan sa saiyang agom,

huli ta siya an ina kan gabos na tawo.

Tataramon kan Kagurangnan.

S. An Reina nakatindog sa too mong kamot,
nasasamnohan nin bulawan.

Nobyta kan hade,
hinanyoga an sakong sasabihon
lingawan mo an saimong banwaan
asin an saimong mga kadugo.

S. An Reina nakatindog sa too mong kamot,
nasasamnohan nin bulawan.

Mamawoton kan hade an saimong kagayonan;
siya an saimong Kagurangnan,
kaya kuyogon mo siya.

S. An Reina nakatindog sa too mong kamot,
nasasamnohan nin bulawan.

Mga taga-Tiro madara saimo nin mga regalo;
mga tawong mayaman
magmamawot na mawilihan mo.

S. An Reina nakatindog sa too mong kamot,
nasasamnohan nin bulawan.

Sakong hade, magkakaigwa ka nin dakul na aking lalaki,
na masalihid bilang mga hade sa mga ginikanan mo,
asin gigibohon mo sindang mga pamayo sa bilog na dagâ.

S. An Reina nakatindog sa too mong kamot,
nasasamnohan nin bulawan.

Ikaduwang Babasahon

Nakahiling ako nin sarong babae na nakagubing nin aldaw, nakatungtong sa bulan asin nakokoronahan nin doseng bitoon.

Pagbasa sa Libro nin kapahayagan

11, 19, 12, 1-6, 10

Dangan nabuksan an templo nin Dios sa langit,
kaya nahiling an Kaban nin Tipan nin Dios.
Nagkaigwa nin mga kikilat, hagubuhob, daguldol, linog
saka makusog na uran nin yelo.
Dangan nagtunga an sarong dakulang tanda sa langit:
sarong babae na nakagubing nin aldaw,
nakatungtong sa bulan
asin nakokoronahan nin doseng bitoon.
Siya bados saka napapakurahaw sa sobrang kulog
asin sakit nin pangaki.
Sarô pang tanda an nagtunga sa langit;
igwa nin sarong dakulang dragon na kolor pula,
may pitong payo saka sampolong sungay,
asin may korona an lambang payo kaiyan.
Ginuyod niya kan saiyang ikog an ikatulong kabtang
kan mga bitoon saka itinapok sa dagâ.
Nagtindog siya sa atubangan kan babaeng
madali nang mangaki,
tanganing halonon an omboy pakamundag kaiyan.
An babae nangaki nin lalaki na iyo an maghahade
sa gabos na nacion may kapot na pamakol na lansang.
Alagad inagaw an aki
dangan dinara sa Dios asin sa saiyang trono.
Nagdulag ang babae pasiring sa kalantadan,
sa lugar na inandam para saiya nin Dios
tanganing atamanon siya dumana
sa laog nin mil doscientos sesentang aldaw.
Dangan nakadangog ako nin makusog na tingog
sa langit na nagsabi,
“Nag-abot na ngonian an kaligtasan,
an kapangyarihan asin an kahadean nin satuyang Dios
patin nin kapangyarihan nin saiyang Cristo!

Huli ta an parasumbong kan satong mga tugang,
an parasumbong sa atubang nin Dios aldaw-banggi,
inihulog na hale sa langit."

Tataramon kan Kagurangan.

Pagrokyaw bâgo an Evangelio

S. Alleluia, Alleluia.

Tara, Maria panô ka nin gracia an Kagurangan yaon saimo
paladan ka sa gabos na mga babae.

S. Alleluia, Alleluia.

Evangelio

Babae, uya an saimong aki. Aki, uya an saimong ina.

✠ Pagbasa kan Evangelio susog ki San Juan

19, 25-27

Nakatindog harani sa cruz si Jesus an saiyang ina,
saka an tugang na babae kan saiyang ina,
si Maria na agom ni Cleofas,
asin si Maria Magdalena.

Kan mahiling ni Jesus an saiyang ina,
asin an disipulo na padangat niya sa kataed kaini,
sinasabi niya an saiyang ina,
“Babae, uya an saimong aki.”

Dangan sinabihan niya an disipulo,
“Uya an saimong ina.”

Poon kaidto, inako kan disipulo
an ina ni Jesus sa saiyang harong.

Marahay na Bareta kan Kagurangan.

MGA PAMIBI NIN BANWAAN

Viernes
ENOT NA ALDAW

Para sa mga Familia asin mga Kaakian

Pataratara kan padi:

**Bilang sarong familia,
iitaas niato ang satuyang mga puso asin isip sa satuyang Ama,
tanganing sa tabang asin pamibi kan satuyang Ina,
Nuestra Señora de Peñafrancia,
iwaras niya sato ang satuyang mga pangangaipo.**

S. Kagurangnan, hinanyoga an samong pamibi.

Mga pag-arang:

1. Tanganing an satuyang Santo Papa, gabos na mga obispo, kapadian, diacono, asin mga religiosos, sa tahaw kan mga pagsakit asin kadificilan sa pagataman kan kahalagahan kan buhay asin familia, mapakusog asin padagos na manindogan sa katotoohan, ipamibi niato sa Kagurangnan.
S. Kagurangnan, hinanyoga an samong pamibi.
2. Tanganing an gabos na namamayo kan satuyang banwaan, sinda magin man lugod dayupot sa pag-ataman asin pagpapahalaga sa buhay nin katawohan asin papagdanayon an katanasan asin katoninongan, ipamibi niato sa Kagurangnan.
S. Kagurangnan, hinanyoga an samong pamibi.
3. Tanganing an gabos na familia, mag-danay na sararô sa tabang asin pagkamoot nin Dios, ipamibi niato sa Kagurangnan.
S. Kagurangnan, hinanyoga an samong pamibi.
4. Tanganing an gabos na mga magurang; an mga mag-aragom padagos na magin dayupot sa lambang sarô asin padakulaon an saindang mga aki sa pagkamoot asin pagkamaibod sa mahal na Dios, ipamibi niato sa Kagurangnan.
S. Kagurangnan, hinanyoga an samong pamibi.

5. Tanganing an gabos na yaon na sa ikaduwang buhay,
an satuyang mga kafamilia asin mga katoood
asin an gabos na mga gadan,
magkatiripon liwat sa harong na nakatagama sainda sa langit,
ipamibi niato sa Kagurangan.
S. Kagurangan, hinanyoga an samong pamibi.

Pamibi kan padi:

**Ama nin bilog na katawohan,
dangoga an pamibi kan saimong mga aki,
mamatean man lugod niamo
an saimong langitnon na pangataman.
Huli ki Cristo samong Kagurangan.**
S. Amen.

Sabado
IKADUWANG ALDAW
Para sa mga Jovenes

Pataratara kan padi:

Dios na samuyang Ama,
kami na may pagsarig sa intercesion kan samuyang mahal na Ina,
mapakumbaba kaming namimibi para sa marhay na pag-antabay
asin pangataman sa gabos na mga jovenes.

S. Kagurangan, hinanyoga an samong pamibi.

Mga pag-arang:

1. Tanganing an satong Santo Papa, mga obispo asin kapadian,
sa saindang ministerio padagos nindang giyahan
asin pakusogon sa katotoohan asin pagkamoot
an gabos na mga jovenes, ipamibi niato sa Kagurangan.
S. Kagurangan, hinanyoga an samong pamibi.
2. Tanganing an gabos na may katongdan sa gobierno,
padagos man nindang pangatamanon an dignidad asin derechos
kan gabos na mga jovenes, ipamibi niato sa Kagurangan.
S. Kagurangan, hinanyoga an samong pamibi.
3. Tanganing an gabos na mga jovenes,
na sinda lugod dai madara kan mga material na bagay sa karâtan
asin daing pagmangno sa kapwa, ipamibi niato sa Kagurangan.
S. Kagurangan, hinanyoga an samong pamibi.
4. Tanganing kita gabos na uya digdi,
magin man lugod kitang mga marhay na pangarogan
sa gabos na mga jovenes, ipamibi niato sa Kagurangan.
S. Kagurangan, hinanyoga an samong pamibi.
5. Tanganing an gabos na mga jovenes na naghehelang
asin may mga kamatean lugod manompongan ninda
an karahayan asin paglaom sa mga sacrificio ni Cristo
para sa kaligtasan nin mga tawo,
ipamibi niato sa Kagurangan.
S. Kagurangan, hinanyoga an samong pamibi.

Pamibi kan padi:

Dios Ama burabod nin karahayan asin pagkamoot,
warasan man lugod an saimong banal na Espiritu
sa gabos na mga jovenes tanganing hanapon ninda
an tunay na kaogmahan asin pagkamoot.

Huli ki Cristo samong Kagurangnan.

S. Amen.

Domingo
IKATOLONG ALDAW
Para sa mga Religiosos

Pataratara kan padi:

**An Kagurangnan panô nin pagkamoot
lalo na sa nagrarani sa saiya,
sa paagi kan mamomoton na intercesion ni Ina,
Nuestra Señora de Peñafrancia,
hagadon niato an gracia nin mahal na Dios.**

S. Kagurangnan, hinanyoga an samong pamibi.

Mga pag-arang:

1. Tanganing an Santo Papa, mga obispo, mga padi, asin religiosos, lugod danay sindang maglingkod sa Kagurangnan, ipamibi niato sa Kagurangnan.
S. Kagurangnan, hinanyoga an samong pamibi.
2. Tanganing an gabos na lideres sa bilog na kinaban, lugod padagos nindang tabangan an buhay apostolado kan mga religiosos asin religiosas, ipamibi niato sa Kagurangnan.
S. Kagurangnan, hinanyoga an samong pamibi.
3. Tanganing an mga nagtitios, naghehelang, mga may kapansanan sa buhay, mga inaapi na sinda lugod makahanap nin ranga sa Dios, ipamibi niato sa Kagurangnan.
S. Kagurangnan, hinanyoga an samong pamibi.
4. Tanganing kita gabos na uya sa celebracion na ini na danay man lugod kitang magheras sa mga nangangaipo lalong-lalo na sa mga tugang niatong religiosos asin religiosas, ipamibi niato sa Kagurangnan.
S. Kagurangnan, hinanyoga an samong pamibi.

5. Tanganing an gabos na mga padi,
mga religiosos asin religiosas na naenot na sa sato,
makamtan man lugod ninda
an katoninongan na daing kasagkoran,
ipamibi niato sa Kagurangan.
S. Kagurangan, hinanyoga an samong pamibi.

Pamibi kan padi:

Amang makakamhan,
lugod sa paagi kan mga pamibi ni Virgen Maria
makapagbaklay kami gabos
sa dalan nin katanosan pasiring sa saimong kahadean.
Huli ki Cristo samong Kagurangan.
S. Amen.

Lunes
IKA-APAT NA ALDAW

Para sa mga Laiko asin mga Nagtatarabaho sa mga Parokya

Pataratara kan padi:

**Si Virgen Maria na may makusog na pagtubod
nagkuyog sa kabôtan kan Dios Ama,
may pagsarig sa saiyang intercesion,
satuyang ipahayag sa Dios Ama an satuyang mga pangangaipo.**

S. Kagurangan, hinanyoga an samong pamibi.

Mga pag-arang:

1. Tanganing an gabos na mga kaakian na nakakamate nin pag-abuso sa pisikal asin emocional na aspeto kan saindang buhay, lugod mamatean ninda an ranga nin pagkamoot asin paglaom sa Dios, ipamibi niato sa Kagurangan.
S. Kagurangan, hinanyoga an samong pamibi.
2. Tanganing an mga lideres kan satong banwaan maliwanagan na magpadagos na atamanon an kahalagahan asin kasagradohan nin buhay kan mga kaakian sa sinapoponan, ipamibi niato sa Kagurangan.
S. Kagurangan, hinanyoga an samong pamibi.
3. Tanganing an Kagurangan, bendicionan kita kan balaog nin vocacion sa pagka-padi asin pagka-religioso, ipamibi niato sa Kagurangan.
S. Kagurangan, hinanyoga an samong pamibi.
4. Tanganing an gabos na familia orog na an mga suway sa lambang sarô huli sa dai minamawot na kamugtakan sa saindang buhay, na lugod sinda magpadagos sa pagtiwala sa Dios, ipamibi niato sa Kagurangan.
S. Kagurangan, hinanyoga an samong pamibi.

5. Tanganing an mga magurang,
na lugod magpahiling nin marhay na halimbawa
sa pagpadakula kan saindang mga aki
asin maitao man lugod ninda
an mga pangangaipo kan saindang mga aki,
ipamibi niato sa Kagurangnan.

S. Kagurangnan, hinanyoga an samong pamibi.

Pamibi kan padi:

**Kagurangnan, Dios nin pagkamoot, akoa an samong pamibi
asin panoa kami kan liwanag kan saimong Espiritu,
tabangi kami na makasunod sa paarog ni Virgen Maria,
na hanapon ka sa gabos na bagay
asin maogmang magkuyog sa saimong kabôtan.
Huli ki Cristo samong Kagurangnan.**

S. Amen.

Martes
IKA-LIMANG ALDAW
Para sa mga Paratukdo asin mga Media Practitioners

Pataratara kan padi:

**Dios na samuyang pastor,
inaataman mo an saimong banwaan sa manlaen-laen na paagi,
hinanyoga an samong mga pamibi para sa mga paratukdo
asin sa mga tawong padagos an paghanap kan katotoohan.**

S. Kagurangan, hinanyoga an samong pamibi.

Mga pag-arang:

1. Tanganing an Santo Papa, mga obispo,
kapadian asin mga religiosos,
lugod danay sindang magin dayupot na paratukdo,
madunong na mga taga-pamayo,
banal asin handang magdusay kan saindang buhay
sa paglingkod sa banwaan nin Dios,
ipamibi niato sa Kagurangan.
S. Kagurangan, hinanyoga an samong pamibi.
2. Tanganing an mga may katongdan
asin namamahala kan educacion sa satuyang banwaan
an biyaya man lugod kan Espiritu ni Cristo
mag-antabay sainda na dai magmawot na paglingkodan
kundi magin mahuyong surogoon na naglilingkod sa kapwa,
ipamibi niato sa Kagurangan.
S. Kagurangan, hinanyoga an samong pamibi.
3. Tanganing an gabos na mga escuelahan asin mga instituciones,
lugod danay nindang ibalangibog
bako an mga kinabanon na pilosopia asin kadonongan
kundi an tunay na katotoohan asin karahayan kan Evangelio,
ipamibi niato sa Kagurangan.
S. Kagurangan, hinanyoga an samong pamibi.

4. Tanganing an mga paratukdo,
padagos lugod sindang magtao nin giya asin liwanag
sa saindang mga nagmamawot makanood
asin sa kapwa sa paagi kan saindang katukdoan asin paarog,
ipamibi niato sa Kagurangan.

S. Kagurangan, hinanyoga an samong pamibi.
5. Tanganing an gabos na mga estudiante
danay lugod sindang magtalubo sa kadonongan
sa paghanap kan katotoohan sa gabos na bagay,
asin mabuhay sa kabanalan, ipamibi niato sa Kagurangan.

S. Kagurangan, hinanyoga an samong pamibi.

Pamibi kan padi:

Kagurangan, Dios nin pagkamoot,
akoa an samong pamibi
asin panoa kami kan liwanag kan saimong Espiritu,
tabangi kami na makasunod sa paarog ni Virgen Maria,
na hanapon ka sa gabos na bagay
asin maogmang magkuyog sa saimong kabôtan.
Huli ki Cristo samong Kagurangan.

S. Amen.

Miercoles
IKA-ANOM NA ALDAW
Para sa mga may Helang, mga Gurang

Pataratara kan padi:

**May makusog na pagsarig sa pagkamoot
kan satuyang mahal na Ina na iyo an minadara sato
sa pagkamoot kan saiyang Aki,
hagadon niato sa Dios na satuyang Ama,
na pakusogon an satuyang relasyon saiya.**

S. Kagurangan, hinanyoga an samong pamibi.

Mga pag-arang:

1. Tanganing an mga namamayo sa Simbahan,
na sa tabang kan intercesion ni Virgen Maria,
mapa-sainda man an biyaya na nagtatao nin kaomayan
asin kaogmahan, ipamibi niato sa Kagurangan.
S. Kagurangan, hinanyoga an samong pamibi.
2. Tanganing an mga lideres kan satuyang nacion,
padagos man lugod sindang makapaglingkod
nin may dakulang pagpahalaga sa katanosan asin pagkamoot,
ipamibi niato sa Kagurangan.
S. Kagurangan, hinanyoga an samong pamibi.
3. Tanganing an mga naghehelang asin mga gurang na,
sa tabang kan intercesion kan Mahal na Ina,
makamtan ninda an gracia na magpapakusog sainda
asin magtatao kan kinakaipuhan na paglaom asin kaomayan,
ipamibi niato sa Kagurangan.
S. Kagurangan, hinanyoga an samong pamibi.
4. Tanganing kita gabos na uya digdi,
sa paagi kan mamomoton na pag-antabay ni Virgen Maria,
magtalubo kita sa kabanalan sa padagos
niatong pagsunod sa kabôtan ni Cristo,
ipamibi niato sa Kagurangan.
S. Kagurangan, hinanyoga an samong pamibi.

Pamibi kan padi:

Dios Amang makakamhan, warasan sa samo
an kaomayan tanganing mahale an mga kakundian
na dara kan samong pagkakasalà,
nin huli kan intercesion ni Virgen Maria
mapa-samuya man an pagkamoot ni Cristo
na tunay na nagtatao nin kaomayan para sa kaligtasan kan kalag.
Huli ki Cristo samong Kagurangnan.

S. Amen.

Jueves
IKA-PITONG ALDAW

Para sa mga Nagtitios asin mga nasa Bilanggoan

Pataratara kan padi:

**Mamibi kita na sa tabang kan satuyang Ina,
makamtan niato an mga diosnon na biyaya
orog na idtong para sa kaligtasan kan mga nagtitios
asin nasa bilanggoan.**

S. Kagurangan, hinanyoga an samong pamibi.

Mga pag-arang:

1. Tanganing an Santo Papa, mga obispo asin gabos na mga padi,
na lugod danay nindang ipamibi asin atamanon
an mga nagtitios asin an mga tugang niatong nasa bilanggoan
na nawawaran na nin paglaom, ipamibi niato sa Kagurangan.

S. Kagurangan, hinanyoga an samong pamibi.

2. Tanganing an gabos na lideres sa bilog na kinaban,
lugod huli kan saindang katongdan,
magtao nin katanosan asin pagkamoot sa mga nagtitios
asin mga nasa bilanggoan, ipamibi niato sa Kagurangan.

S. Kagurangan, hinanyoga an samong pamibi.

3. Tanganing an mga nagtitios nin huli sa injusticia
na itinatao kan sociedad, lugod dai sinda mawaran nin paglaom
kundi na magdanay sainda an pagkamoot sa pagpamibi,
ipamibi niato sa Kagurangan.

S. Kagurangan, hinanyoga an samong pamibi.

4. Tanganing kita gabos na uya digdi,
na danay man lugod kitang magheras sa mga nangangaipo
lalong-lalo na idtong mga mayong ineerokan
asin mga nasa bilanggoan,
ipamibi niato sa Kagurangan.

S. Kagurangan, hinanyoga an samong pamibi.

5. Tanganing an kalag kan gabos na mga nagtios
asin nakulong kan sinda nabubuhay pa digdi sa kinaban,
akoon man lugod sinda sa kahadean nin Dios,
ipamibi niato sa Kagurangnan.
S. Kagurangnan, hinanyoga an samong pamibi.

Pamibi kan padi:

**Amang maheherakon, ibinubugtak niamo an samuyang sadiri
sa mamomoton na pagsurog kan samuyang mahal na Ina,
pakusugon mo kami sa samong pagsaksi
sa mga itinukdo ni Jesu Cristo,
pakusugon mo kami sa samuyang pagbaklay
sa dalan pasiring sa saimong kahadean.
Huli ki Cristo samong Kagurangnan.**

S. Amen.

Viernes
IKA-WALONG ALDAW
Para sa mga Padi asin mga Seminarista

Pataratara kan padi:

**Maheherakon na Ama, sa samuyang buhay,
padagos mong ipinapahiling asin ipinapamate
an presencia ni Virgen Maria, samuyang Ina,
nag-aarang kami ngonian saimo na dangogon mo lugod
an samong mga pamibi para sa mga padi, seminarista
asin gabos na nagtatrabaho sa simbahan.**

S. Kagurangan, hinanyoga an samong pamibi.

Mga pag-arang:

1. Tanganing an bilog na Simbahan, sa tabang ni Maria,
mapa-uswag lugod an vocacion sa pagka-padi,
ipamibi niato sa Kagurangan.

S. Kagurangan, hinanyoga an samong pamibi.

2. Tanganing an mga nasa gobierno,
lugod sa paagi kan saimong diosnon na pag-antabay
matabangan sinda sa saindang paghingowa
na magin maninigo sa pamamahala para sa kauswagan
kan comunidad na saindang pinamamayohan,
ipamibi niato sa Kagurangan.

S. Kagurangan, hinanyoga an samong pamibi.

3. Tanganing an gabos na mga nagtatrabaho sa simbahan,
na lugod sinda man pakusogon nin Dios
para sa mas marhay asin maninigong paglingkod,
ipamibi niato sa Kagurangan.

S. Kagurangan, hinanyoga an samong pamibi.

4. Tanganing an satong mga tugang na nasa makuring pagsakit,
lugod sa tabang ni Maria, matawan nin kasimbagan
an saindang mga pamibi asin makapag-omaw sa Ama,
ipamibi niato sa Kagurangan.

S. Kagurangan, hinanyoga an samong pamibi.

Pamibi kan padi:

Kagurangnan, Dios nin pagkamoot, akoa an samong pamibi
asin panoa kami kan liwanag kan saimong Espiritu,
tabangi kami na makasunod sa paarog ni Virgen Maria,
na hanapon ka sa gabos na bagay
asin maogmang magkuyog sa saimong kabôtan.

Huli ki Cristo samong Kagurangnan.

S. Amen.

Sabado
IKA-SIYAM NA ALDAW
Para sa mga Lideres asin mga Nagtatrabaho sa Gobierno

Pataratara kan padi:

**May pagsarig sa pagkamoot ni Virgen Maria,
nagtutubod kita na hihinanyogon niya
an satuyang mga kahagadan.**

S. Kagurangan, hinanyoga an samong pamibi.

Mga pag-arang:

1. Tanganing an mga namamayo sa satuyang Simbahan, padagos lugod nindang mapakusog an pagtubod sa Dios, an paglaom sa saiyang kahadean, asin danay na pagsaksi sa buhay nin may tunay na pagkamoot, ipamibi niato sa Kagurangan.
S. Kagurangan, hinanyoga an samong pamibi.
2. Tanganing mga lideres kan satong nacion, lugod sa saindang pag-ako kan katongdan na mamayo para sa karahayan kan kagabsan, ipamibi niato sa Kagurangan.
S. Kagurangan, hinanyoga an samong pamibi.
3. Tanganing an gabos na nagtitios, naghehelang asin nagin victima nin injusticia, lugod dai sinda mawaraan nin paglaom sa Dios na iyo an ginigikanan nin tunay na katoninongan asin katiwasayan sa buhay, ipamibi niato sa Kagurangan.
S. Kagurangan, hinanyoga an samong pamibi.
4. Tanganing an gabos na nagpapahiling kan tunay na espiritu kan pagigin matinao, lugod orog sindang atamanon nin Mahal na Dios asin danay man na mapakusog an saindang pagtubod na makakamtan ninda an kahadean nin Dios, ipamibi niato sa Kagurangan.
S. Kagurangan, hinanyoga an samong pamibi.

Pamibi kan padi:

**Amang makakamhan, lugod makapaghiling kami,
sa paagi kan tabang ni Virgen Maria,
nin tunay na pagsaksi sa samuyang pagtubod
na itinao mo para sa samuyang kaligtasan.
Huli ki Cristo samong Kagurangnan.**

S. Amen.

Domingo Paka-Octava kan Pagkamundag ni Santa Maria
NUESTRA SEÑORA DE PEÑAFRANCIA
Solemnidad

Pataratara kan padi:

**Mamibi kita sa mahal na Dios mantang ginigiromdom niato
an balaog nin devucion sa satuyang Ina,
tanganing magtalubo kita sa kabanalan asin karahayan.**

S. Huli sa mga pamibi ni Ina, Kagurangnan, dangoga kami.

Mga pag-arang:

1. Dios na makakamhan, sa paagi kan saimong gracia si Maria nagin maninigong disipulo ni Cristo.
Giyaha mo man lugod an samong Santo Papa si N., asin an samong obispo si N., patin an gabos na obispo, kapadian asin mga religiosos, sa saindang panuga sa buhay nin totoong pagka-disipulo, ipamibi niato sa Kagurangnan.
S. Huli sa mga pamibi ni Ina, Kagurangnan, dangoga kami.
2. Dios na makakamhan, ginibo mo kaming sarong banwaan na namomoot nang gayo ki Virgen Maria.
Giyaha an gabos na lideres sa gobierno na sinda maglingkod sa banwaan pasiring sa totoong pag-uswag asin pagkasaranô. Likaya sinda sa mga makakasâlanon na gawe nin injusticia, corrupcion, asin pagka-suruway, ipamibi niato sa Kagurangnan.
S. Huli sa mga pamibi ni Ina, Kagurangnan, dangoga kami.
3. Dios na makakamhan, tinao mo samo si Virgen Maria bilang samong Ina tanganing atamanon niya an samong lawas, material, asin espiritual na karahayan.
Daraha an gabos na naghohorasa sa saiyang pag-ampon, pag-giya, pag-ranga asin pag-omay. Lugod sa paagi kan saiyang pagkamoot magtao samo ini nin ginhawa asin intercesion orog nang gayo sa mga nagtitios asin may helang, sa mga aki asin mga babae, sa mga mayong trabaho asin mayong ineerokan, ipamibi niato sa Kagurangnan.
S. Huli sa mga pamibi ni Ina, Kagurangnan, dangoga kami.

4. Dios na makakamhan, padagos mo samong pinapahiling
an daing sukol mong pangangataman
para sa mga tawo kan Kabikolan
na kun saen saimong minawot si Nuestra Señora de Peñafrancia
na magin samuyang patrona.
Lugod pakusogon kami kan samong mamomoton na Ina
sa pagpa-orog nin tiwala sa saimong diosnon na pagkamoot
asin sa maninigong paglingkod sa saimong namomotan na Aki,
ipamibi niato sa Kagurangan.
- S. Huli sa mga pamibi ni Ina, Kagurangan, dangoga kami.**
5. Dios na makakamhan, nin huli kan saiyang pag-ako,
ginibo mo si Virgen Maria na magin tanda
nin pagkasararô sa gabos na nagtutubod.
Lugod kami gabos,
na mga devotos ni Nuestra Señora de Peñafrancia,
magtalubo sa kabanalan asin karahayan
sa pagcelebrar kan balaog nin devucion,
ipamibi niato sa Kagurangan.
- S. Huli sa mga pamibi ni Ina, Kagurangan, dangoga kami.**

Pamibi kan padi:

**Amang makapangyarihan, warasan sa saimong mga surogoon,
nin huli na lamang kan samong devucion
ki Nuestra Señora de Peñafrancia,
an saindang danay na karahayan sa kalag asin sa hawak.
Huli ki Cristo samong Kagurangan.**

S. Amen.

MGA MISA SA KAOMAWAN NI NUESTRA SEÑORA DE PEÑAFRANCIA

PASASALAMAT

An pagpublicar kan librong Mga Misa sa Kaomawan ni Nuestra Señora de Peñafrancia nagin posible sa paagi kan mga tabang kan mga minasunod:

- Rev. Fr. Luisito A. Occiano
- Rev. Fr. Eric P. Bobis
- Patrick Henry I. Balmaceda
- John Paul M. Aven
- Juan Carlos R. Madrid
- Jared Dale M. Estolloso
- Anthony M. Avila
- Vince Carlo M. Puno
- Mika Ella R. Fernandez

Lugod an Dios, sa paagi kan intercesion kan satong Ina, Nuestra Señora de Peñafrancia, bendicionan asin atamanon kamo.

BIBLIOGRAFIA

- Beriña, P. R. (2005). *Misal na Bicol - Bagong Edicion* (Taon A ed.). Archdiocese of Caceres.
- Leccionario*. (n.d.). Archdiocese of Caceres.
- Lectionary*. (n.d.). United States Conference of Catholic Bishops.
- Misal Romano sa Bicol* (Propio nin mga Santos asin Santas ed.). (n.d.). Bicol Regional Liturgy Committee.
- Peñafrancia Missal*. (2018). Minor Basilica and National Shrine of Our Lady of Peñafrancia.
- Rojas, J. (1995). *Sacramentario*. Archdiocese of Caceres.
- Roman Missal*. (2011). United States Conference of Catholic Bishops.
- Vergara, R. (2010). *Novena ki Nuestra Señora de Peñafrancia*. Minor Basilica and National Shrine of Our Lady of Peñafrancia.
- Marahay na Bareta Biblia*. (1992). Philippine Bible Society.